

MANIFIESTO PER UNA SOZIEDAT MÁS CHOBEN Y PARTIZIPATIBA

Os chobens zaragozanos nos emos reuniu istos diyas ta contimostrar a la soziedat que más allá d'a imachen negatiba que se proyeuta de nusatros dende muitos ambitos, tenemos inquietuz y las femos reyalidat. Perque somos fartos de leyer toz os diyas en os periodicos y ascuitar y beyer en a televisión que os chobens nomás nos ne femos per dibertir-nos d'una traza que a soziedat condena, fartos de leyer sobre as botelladas, as drogas y os embarazos no deseyaus, fartos de beyer cómo a nuestra soziedat condena a la chobentú sin prebar de comprender-la.

Somos aquí, en a carrera, en o nuestro espazio, an que siempre emos estau y an que nunca no abríamos d'aber saliu, contimostrando a berdadera reyalidat d'os chobens, empentando baluras como a partizipación, contimostrando que somos parte autiba d'a soziedat, que construyimos ziudat, una ziudat que queremos ubierta y sostenible.


Somos chobens comprometius, somos escuela de ziudadanía ta nusatros mesmos y ta qui partizipa con nusatros. No tenemos atro ochetibo que fomentar o cambio sozial y a construcción d'un mundo más umano, aplicando diyariamén os prinzipios de solidaridat, integrazión, cooperazión, partizipación, compromiso y aizión.

Tamién somos plurarls. Entenemos que a nuestra balura radica en ello y faborezemos a dibersidat, no solamén ideyolochica, sino tamién sozial, funzional, razial, relichiosa, nazional, afeutibo-secsual y d'identidat. Y tenemos un comprimís claro y profundamén reibindicatibo d'implicazión con os problemas sozials autuals que, prou que sí, tamién nos afeutan a nusatros.

En iste sentiu, desichimos a las almenistracions que se'n faigan con politicas reyalmén efizients y comprometidas ta meter fin a os problemas que nos afeutan direutamén, como a dificultat d'acceso a la bibienda y a un treballo dinno. Pero no queremos estar meros espeutadors, sino achens autibos en iste prozeso de cambio, ya que d'as dezisions que agora se prengan, no dependemos nomás nusatros, sino tamién o futuro d'ista soziedat.

Per tot, desichimos a las almenistracions que metan en marcha mecanismos reyals de partizipación t'os chobens y que refirman as nuestras iniciatibas, no sólo que economicamén, sino que tamién colaboren con nusatros en a dinamización d'os chobens ta lograr os nuestros ochetibos.

Ta ello ye nezesario dotar d'un paper protagonista a os Consellos de Chobentú, democraticos, partizipaus y con una fuerte capazidat de proposa d'as suyas entidaz. L'almenistración ha de comprometer-se con os chobens zaragozanos y alquirir berdaderas responsabilidaz.



18, 19 y 20 de octubre de 2007
Pza. de los Sitios de Zaragoza
www.delibreeleccion.org